


MINGGU PALMA, 10 APRIL 2022

Daripada Satu
Kehidupan Tidak
Harmoni kepada
Harmoni dengan
Allah



Pesanan *Laudato Si'*

Yesus hidup dalam harmoni penuh dengan dunia ciptaan, dan orang-orang hairan: "Angin dan ombak pun taat kepada perintah-Nya. Orang apakah Dia ini?" (Matius 8:27).

Dalam pemahaman Kristian tentang dunia, takdir seluruh ciptaan terikat dengan misteri Kristus, yang hadir sejak permulaan: "Allah menciptakan semesta alam melalui Kristus dan untuk Kristus." (Kol 1:16). Prolog Injil Yohanes (1:1-18) mengungkapkan tindakan penciptaan Kristus sebagai tindakan Firman Ilahi (*Logos*). Secara tidak terduga, prolog itu selanjutnya mengatakan bahawa Firman itu "menjadi daging" (Yoh 1:14). Satu Peribadi Allah Tritunggal masuk ke dalam dunia ciptaan dan menjalani nasib-Nya bersamanya sampai di kayu salib.

Laudato Si' #98 - #99

Ambil masa untuk mempertimbangkan kurnia iman. Ambil masa untuk merenung keindahan iman. Ambil masa untuk menghargai bahawa iman membuka dan mengaktifkan hidup kita sehingga kita mempunyai hubungan dinamik ini dengan misteri Tuhan Allah. Pertemuan kita dengan Yesus melalui Roh Kudus terus membentuk dan mengubah kita. Ini menyebabkan kehidupan kita sentiasa segar dan penuh harapan. Bagi kita semua, Tuhan Allah adalah sesuatu yang sungguh Indah dalam kehidupan kita. Jangan biarkan apa-apa yang memecahkan keharmonian antara Tuhan dan kita.

INJIL – LUKAS 23:34-47

Kisah Kesengsaraan - bahagian terpilih

Apabila tiba di tempat yang disebut "Tengkorak," mereka menyalibkan Yesus dan kedua-dua orang penjahat itu - seorang di sebelah kanan Yesus dan seorang lagi di sebelah kiri-Nya.

Yesus berkata, 'Ya Bapa, ampunilah mereka! Mereka tidak mengetahui apa yang dilakukan oleh mereka.' Pakaian Yesus dibahagi-bahagikan antara mereka sendiri dengan membuang undi.

Kristus yang disalibkan itu diejek.

Semua orang yang berdiri di situ memandang sahaja, tetapi para pemimpin orang Yahudi mengejek Dia dengan berkata, "Dia telah menyelamatkan orang lain. Jika dia benar-benar Penyelamat yang dipilih oleh Allah, biarlah dia menyelamatkan dirinya sendiri!" Askar-askar juga mengejek dia. Mereka mendekati Yesus lalu memberi anggur masam kepada-Nya. Mereka berkata, "Jika kamu raja orang Yahudi, selamatkanlah dirimu sendiri!" Pada sebelah atas kayu salib Yesus, tertulis kata-kata: "Inilah Raja Orang Yahudi."

Penjahat yang bertaubat

Salah seorang penjahat yang disalibkan di situ menghina Yesus. Dia berkata, "Bukankah kamu Penyelamat yang diutus oleh Allah? Selamatkanlah dirimu sendiri dan juga kami!" Tetapi penjahat yang seorang lagi menegur dia dan berkata, "Tidakkah kamu takut akan Allah? Kita semua sudah dihukum mati. Hukuman kita berdua memang setimpal dengan perbuatan kita, tetapi orang ini tidak bersalah!" Lalu dia berkata kepada Yesus, "Ya Yesus, ingatlah akan saya, apabila Tuan menjadi Raja!" Yesus berkata

kepadanya, "Percayalah, pada hari ini kamu akan bersama-sama Aku di Firdaus."

Kematian Yesus

Kira-kira pukul dua belas tengah hari, matahari tidak bersinar dan seluruh negeri itu diliputi kegelapan sehingga pukul tiga petang. Pada waktu itu tirai yang tergantung di dalam Rumah Tuhan koyak menjadi dua helai. Lalu Yesus berseru dengan suara lantang, "Ya Bapa, Aku serahkan diri-Ku ke dalam tangan-Mu!" Setelah berkata demikian, Dia pun meninggal.

Selepas kematian

Ketua askar nampak apa yang telah berlaku. Dia memuji Allah dan berkata, "Memang Dia tidak bersalah!"

RENUNGAN

Dengan siapakah kita kaitkan diri kita dalam kisah kesengsaraan dalam injil? Beberapa orang penulis rohani meminta kita untuk mempertimbangkan bahawa selain daripada penjahat yang bertaubat atau ketua pasukan askar itu, boleh jadi kita adalah orang yang menyertai orang ramai yang berteriak, "Salibkan dia, salibkan dia ...!" Ini kerana sebahagian daripada diri kita mungkin cenderung untuk terlalu risau akan apa orang lain lakukan, dengan cara menciptakan ketidakharmonian.

Fokus amalan Prapaska kita yang sepatutnya bukanlah terhadap orang lain, melainkan diri kita sendiri. Pada dasarnya, ia adalah tentang pengalaman pertaubatan kita yang berterusan. Ini kerana kata "YA" kita kepada Yesus bukanlah untuk sekali sahaja. Ia adalah YA yang berlaku dalam konteks kita menghidupi kehidupan kita. Dalam perjalanan itu, kita mungkin telah tersesat atau kehilangan Yesus.

Amalan Prapaska ini ialah panggilan kepada kita untuk memperbaharui YA kita dan untuk memberi semula komitmen kepada Yesus. Perhubungan kita dengan yang Ilahi bukanlah satu hala. Allah bukanlah makhluk yang 'statik' tetapi memasuki hati mereka yang terbuka dan yang ikhlas. Dalam cara ini, terdapat dinamisme yang besar dalam ruang diantara hati kita dan hati Allah. Pertaubatan kemudian mencipta keadaan tentang pengalaman "baru" dan membawa kepada "penyembuhan".

Kita dipanggil untuk menjadi seperti penjahat yang bertaubat itu, yang tidak bergembira dengan kejatuhan orang lain seperti yang rakan sepenjahatnya lakukan terhadap Yesus. Penjahat yang bertaubat itu mengakuinya dan bertaubat semasa di salib. Dengan berbuat demikian, dia bergerak dari keadaan ketidakharmonian kepada harmoni dengan Allah.

Yesus, ingatlah aku bila Engkau menjadi Raja.

LATIHAN PRAPASKA

Renungkan dan periksalah keputusan kita dan pendirian yang telah kita ambil semasa musim Prapaska. Buatlah keputusan tentang bagaimana untuk melakukan apa yang kita mulai kepada suatu cara hidup yang mampan untuk sepanjang hidup kita, mencerminkan suatu kerohanian yang berpusatkan pada ciptaan.

PENDIRIAN SAYA

- Tuliskan wawasan peribadi saya yang singkat dan doa tentang bagaimana saya boleh mengambil peranan untuk menjaga bumi ini dan masuk ke dalam keharmonian dengan ciptaan. Sebagai contoh, bermurah hati terhadap pembantu rumah saya, rakan sekerja saya, tidak membazir, atau kurangkan

penggunaan plastik seberapa yang boleh.

- Dengan konkrit, letakkan matlamat-matlamat yang telah kita tetapkan untuk menyumbang kepada Kempen Prapaska 2022 dan serahkannya kepada paroki atau keuskupan.
- Sukarela membantu paroki saya menjadi paroki-eko.



KEUSKUPAN
MELAKA
JOHOR

www.mjdiocese.my
🌐📱 mjdiocese
📍📱 malaccajohorediocese
caritasmjd.mjdiocese.my
creationjustice.mjdiocese.my



MJD
50
2022

www.lenten.mjdiocese.my
🌐 MJD Lenten